

Հավելված
ՀՀ կառավարության 2015 թվականի
ապրիլի 9-ի N 399 - Ն որոշման

Կ Ա Ր Գ

ՀԻՄՆԱԴՐՈՒԹԱՅԻՆ ՓԱՍՏԱԹՂԹԻ ԵՎ ՆԱԽԱՏԵՍՎՈՂ ԳՈՐԾՈՒՆԵՈՒ-
ԹՅԱՆ ՇՐՋԱԿԱ ՄԻՋԱՎԱՅՐԻ ՎՐԱ ԱԶԴԵՑՈՒԹՅԱՆ ՓՈՐՁԱԲՆՆՈՒԹՅԱՆ
ԻՐԱԿԱՆԱՑՄԱՆ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով կարգավորվում են հիմնադրության փաստաթղթի և նախատես-
վող գործունեության շրջակա միջավայրի վրա ազդեցության փորձաքննության (այսու-
հետ՝ փորձաքննություն) իրականացման հետ կապված հարաբերությունները:

2. Փորձաքննությունը, համաձայն «Շրջակա միջավայրի վրա ազդեցության գնահատ-
ման և փորձաքննության մասին» Հայաստանի Հանրապետության օրենքի (այսուհետ՝ օրենք)
15-րդ հոդվածի 3-րդ մասի, իրականացվում է երկու փուլով՝ նախնական և հիմնական:

3. Փորձաքննության նախնական և հիմնական փուլերում, համաձայն օրենքի 28-րդ
հոդվածի 1-ին մասի, կարող է պայմանագրային հիմունքներով ներգրավվել համապա-
տասխան ոլորտի իրավաբանական կամ ֆիզիկական անձ հանդիսացող փորձագետ, որի
կողմից կազմվում և փորձաքննական կենտրոն է ներկայացվում մասնագիտական եզրա-
կացություն:

4. Հիմնադրության փաստաթղթերի փորձաքննության դեպքում գործընթացում
ներգրավվում է Հայաստանի Հանրապետության առողջապահության նախարարությունը,
որի կողմից տրվում է եզրակացություն կամ կարծիք:

5. Փորձաքննության նախնական փուլում՝ 10 աշխատանքային օրվա, իսկ հիմնական փուլում՝ 20 աշխատանքային օրվա ընթացքում պետական կառավարման մարմիններից հիմնադրությային փաստաթղթի կամ նախատեսվող գործունեության վերաբերյալ կարծիք, եզրակացություն չստանալու դեպքում դրանք համարվում են դրական: Մինչև ժամկետը լրանալը ուշացման վերաբերյալ ներկայացված պատճառաբանությունը լիազոր մարմնի կողմից հիմնավոր համարվելու դեպքում՝ սույն կետով նախատեսված ժամկետը կարող է երկարաձգվել ոչ ավելի, քան հինգ աշխատանքային օրով: Լիազոր մարմինը ժամկետի երկարաձգման կամ մերժման մասին սահմանված կարգով տեղեկացնում է ներկայացրած մարմնին՝ պատճառաբանության ստացման օրվանից ոչ ուշ, քան երրորդ օրը: Հիմնադրությային փաստաթղթի կամ նախատեսվող գործունեության վերաբերյալ երկարաձգված ժամկետում, իսկ ժամկետի երկարաձգումը մերժվելու դեպքում նախատեսված ժամկետում կարծիք, եզրակացություն չստանալու դեպքում դրանք համարվում են դրական:

6. Փորձաքննության նախնական փուլում փորձաքննության է ենթարկվում ձեռնարկողի կողմից ներկայացված շրջակա միջավայրի վրա ազդեցության նախնական գնահատման հայտը: Ձեռնարկողի կողմից փորձաքննության են ներկայացվում փաստաթղթի թղթային և էլեկտրոնային տարբերակները:

7. Ձեռնարկողի նախաձեռնությամբ քաղաքաշինական ոլորտի հիմնադրությային փաստաթղթերի նախնական գնահատման հայտի փորձաքննությունը և քաղաքաշինական ծրագրային փաստաթղթերի նախագծման առաջադրանքի համաձայնեցման գործընթացները կարող են համատեղվել՝ Հայաստանի Հանրապետության օրենսդրության պահանջների ապահովման դեպքում:

8. Փորձաքննության հիմնական փուլում փորձաքննության է ենթարկվում ձեռնարկողի կողմից ներկայացված շրջակա միջավայրի վրա ազդեցության գնահատման մասին

հաշվետվությունը: Ձեռնարկողի կողմից փորձաքննության են ներկայացվում փաստաթղթի թղթային և էլեկտրոնային տարբերակները:

9. Ձեռնարկողն ընդերքօգտագործման բնագավառի համապատասխան փաստաթղթերը փորձաքննության է ներկայացնում ոլորտի լիազոր մարմնի միջոցով:

II. ՓՈՐՁԱՔՆՆՈՒԹՅԱՆ ՆԱԽՆԱԿԱՆ ՓՈԻԼՈՒՄ ՀԻՄՆԱԴՐՈՒԹՅՈՒՆ
ՓԱՍՏԱԹՂԹԻ ԵՎ ՆԱԽԱՏԵՍՎՈՂ ԳՈՐԾՈՒՆԵՈՒԹՅԱՆ՝ Ա, Բ, Գ
ԿԱՏԵԳՈՐԻԱՆԵՐԻ ՀԱՅՏԻ ՓՈՐՁԱՔՆՆՈՒԹՅԱՆ ԻՐԱԿԱՆԱՑՄԱՆ
ԿԱՐԳԸ

10. Ձեռնարկողը, որը մտադիր է իրականացնել օրենքի 14-րդ հոդվածով սահմանված հիմնադրությային փաստաթղթի դրույթները կամ նախատեսվող գործունեությունը, գրավոր դիմում է լիազոր մարմին՝ ներկայացնելով շրջակա միջավայրի վրա ազդեցության նախնական գնահատման հայտը՝ համապատասխան փաստաթղթերով: Լիազոր մարմինը երկօրյա ժամկետում՝ սահմանված կարգով, համապատասխան ընթացք տալու մասին հանձնարարականով հայտը և համապատասխան փաստաթղթերը տրամադրում է փորձաքննական կենտրոնին:

11. Փորձաքննական կենտրոնը հայտի լրակազմ չլինելու և (կամ) դրանում պարունակվող տեղեկատվության մեջ անճշտությունների առկայության դեպքում, լիազոր մարմնի հանձնարարությամբ, օրենքի 16-րդ հոդվածի 7-րդ մասի համաձայն, հայտի ստացման օրվանից ոչ ուշ, քան հինգ աշխատանքային օրվա ընթացքում հայտը վերադարձնում է ձեռնարկողին՝ լրակազմելու և (կամ) անճշտությունները վերացնելու համար: Հայտի վերադարձման պահից նախնական փուլի ժամկետը համարվում է դադարեցված՝ մինչև ձեռնարկողի լրակազմած հայտը փորձաքննական կենտրոն ներկայացնելու պահը:

12. Նախնական փորձաքննության արդյունքում՝ օրենքի 16-րդ հոդվածի 5-րդ մասի 1-ին կետով սահմանված որոշման ընդունման դեպքում 30 աշխատանքային օրվա ընթացքում լիազոր մարմինը կամ, լիազոր մարմնի հանձնարարությամբ, փորձաքննական կենտրոնը ձեռնարկողին է տրամադրում հիմնադրությային փաստաթղթի դրույթի կամ նախա-

տեսվող գործունեության անթույլատրելիության վերաբերյալ գրություն՝ համապատասխան հիմնավորումներով:

13. Օրենքի 16-րդ հոդվածի 5-րդ մասի 2-րդ կետով սահմանված որոշման ընդունման դեպքում 30 աշխատանքային օրվա ընթացքում հիմնադրության փաստաթղթի կամ նախատեսվող գործունեության հայտը՝ համապատասխան հիմնավորումներով վերադարձվում է ձեռնարկողին՝ լրակազմման:

14. Փորձաքննական կենտրոնը լրակազմ հայտն ստանալուց հետո յոթօրյա ժամկետում այն տեղադրում է իր էլեկտրոնային կայքում և դրա մասին տեղեկացնում է՝ հիմնադրության փաստաթղթի դեպքում՝ մարզպետին, Երևան քաղաքում՝ Երևանի քաղաքապետին և տվյալ ազդակիր վարչական շրջանի ղեկավարին, իսկ նախատեսվող գործունեության դեպքում՝ ազդակիր համայնքի ղեկավարին (այսուհետ՝ քննարկումների պատասխանատու)՝ համատեղ հանրային ծանուցում և քննարկումներ կազմակերպելու նպատակով:

15. Օրենքի 16-րդ հոդվածի 5-րդ մասի 3-րդ կետով սահմանված որոշման ընդունման դեպքում 30 աշխատանքային օրվա ընթացքում ձեռնարկողին տեղեկացվում է, որ հիմնադրության փաստաթուղթը կամ նախատեսվող գործունեությունը ենթակա է անդրասիմանային համատեքստում ազդեցության գնահատման: Այս դեպքում փորձաքննությունն իրականացվում է օրենքի 22-րդ և 23-րդ հոդվածների համաձայն:

16. Օրենքի 16-րդ հոդվածի 5-րդ մասի 4-րդ կետով սահմանված որոշման ընդունման դեպքում՝ հիմնադրության փաստաթղթի և Ա, Բ կատեգորիաների գործունեության տեսակների համար, համաձայն օրենքի 14-րդ հոդվածի 4-րդ մասի, փորձաքննական կենտրոնը 30 աշխատանքային օրվա ընթացքում կազմում և ձեռնարկողին է տրամադրում տեխնիկական առաջադրանք՝ լիազոր մարմնի կողմից սահմանված ձևով:

17. Օրենքի 16-րդ հոդվածի 5-րդ մասի 5-րդ կետով սահմանված որոշման ընդունման դեպքում փորձաքննական կենտրոնը 30 աշխատանքային օրվա ընթացքում կազմում

և լիազոր մարմնի կողմից հաստատումից հետո ձեռնարկողին է տրամադրում փորձաքննական եզրակացություն:

18. Հիմնադրությային փաստաթղթի և Ա, Բ կատեգորիաների գործունեության տեսակների վերաբերյալ լրակազմման վերադարձնելու որոշման ընդունման դեպքում լրամշակված հայտը ձեռնարկողի կողմից փորձաքննական կենտրոն ներկայացվելուց հետո, համաձայն օրենքի 16-րդ հոդվածի 1-ին մասի և 5-րդ մասի 4-րդ կետի, փորձաքննական կենտրոնը 30 աշխատանքային օրվա ընթացքում ձեռնարկողին է տրամադրում տեխնիկական առաջադրանք:

19. Գ կատեգորիայի գործունեության տեսակների վերաբերյալ լրակազմման վերադարձնելու որոշման ընդունման դեպքում լրամշակված հայտը ձեռնարկողի կողմից փորձաքննական կենտրոն ներկայացվելուց հետո, համաձայն օրենքի 16-րդ հոդվածի 1-ին մասի, փորձաքննական կենտրոնը 30 աշխատանքային օրվա ընթացքում ձեռնարկողին է տրամադրում փորձաքննական եզրակացություն:

III. ՓՈՐՁԱՔՆՆՈՒԹՅԱՆ ՀԻՄՆԱԿԱՆ ՓՈՒԼՈՒՄ ՀԻՄՆԱԴՐՈՒԹՅԱՅԻՆ ՓԱՍՏԱԹՂԹԻ ԵՎ ՆԱԽԱՏԵՍՎՈՂ ԳՈՐԾՈՒՆԵՈՒԹՅԱՆ՝ Ա, Բ ԿԱՏԵԳՈՐԻԱՆԵՐԻ ՓՈՐՁԱՔՆՆՈՒԹՅԱՆ ԻՐԱԿԱՆԱՑՄԱՆ ԿԱՐԳԸ

20. Փորձաքննության հիմնական փուլում օրենքի 16-րդ հոդվածի 8-րդ մասով սահմանված տեխնիկական առաջադրանքին համապատասխան կազմված հաշվետվությունը՝ կից փաստաթղթերով, ձեռնարկողը ներկայացնում է փորձաքննական կենտրոն:

21. Փորձաքննական կենտրոնը հաշվետվությունների և կից փաստաթղթերի վերաբերյալ կարծիքները, եզրակացություններն ստանալուց հետո դիմում է քննարկումների պատասխանատուին՝ հանրային ծանուցում և քննարկումներ կազմակերպելու համար:

22. Փորձաքննական կենտրոնը հաշվետվությունը՝ կից փաստաթղթերով ստանալուց հետո 20 աշխատանքային օրվա ընթացքում (կարծիքներ, եզրակացություններ, առա-

ջարկություններ ստանալուց հետո) իրականացնում է հանրային ծանուցում, իսկ ծանուցումից հետո յոթ աշխատանքային օրվանից ոչ շուտ քննարկումների պատասխանատուի հետ, ձեռնարկողի աջակցությամբ, իրականացնում է հանրային քննարկում:

23. Հաշվետվությունների վերաբերյալ կարծիքները, եզրակացությունները, հանրային քննարկման արձանագրությունները և հանրության հիմնավորված դիտողություններն ու առաջարկություններն ստանալուց հետո փորձաքննական կենտրոնը, համաձայն օրենքի 20-րդ հոդվածի, կազմում է փորձաքննական եզրակացության նախագիծ:

24. Հիմնադրության փաստաթղթի և Ա կատեգորիայի գործունեության տեսակների դեպքում՝ 60-աշխատանքային օրվա ընթացքում, իսկ Բ կատեգորիայի գործունեության տեսակների դեպքում՝ 40 աշխատանքային օրվա ընթացքում փորձաքննական կենտրոնը կազմում և լիազոր մարմնի կողմից հաստատումից հետո ձեռնարկողին է տրամադրում պետական փորձաքննական եզրակացություն:

25. Փորձաքննական կենտրոնի հիմնավորված որոշմամբ փորձաքննության հիմնական փուլի ժամկետը կարող է երկարաձգվել՝ հիմնադրության փաստաթղթի և Ա կատեգորիայի գործունեության տեսակների դեպքում՝ մինչև 30 աշխատանքային օր, իսկ Բ կատեգորիայի գործունեության տեսակների դեպքում՝ մինչև 20 աշխատանքային օր, բայց ոչ ավելի, քան մեկ անգամ, գրավոր՝ համապատասխան հիմնավորումներով, դրա մասին տեղեկացնելով ձեռնարկողին:

26. Փորձաքննական կենտրոնը սույն կարգի 25-րդ կետի համաձայն ներկայացված դիտողություններին ձեռնարկողի կողմից բավարար պատասխաններ չտրվելու դեպքում գրավոր տեղեկացնում է ձեռնարկողին՝ նշելով հայտնաբերված անհամապատասխանությունները, թերացումները, սխալները, դրանք վերացնելու համար տրամադրվում է մինչև 10 աշխատանքային օր:

27. Սույն կարգի 26-րդ կետով սահմանված ժամկետում պահանջվող փաստաթղթերը և լրամշակումները ձեռնարկողի կողմից փորձաքննական կենտրոն չներկայացվելու կամ թերություններով, ոչ լիարժեք ներկայացվելու դեպքում ձեռնարկողին տրվում է լիազոր մարմնի կողմից հաստատված բացասական եզրակացություն:

28. Ձեռնարկողի կողմից համապատասխան փաստաթղթերը սույն կարգի 25-րդ և 26-րդ կետերով սահմանված ժամկետներում լրակազմ ներկայացվելու դեպքում փորձաքննական կենտրոնը լիազոր մարմնի կողմից հաստատված եզրակացությունը տրամադրում է ձեռնարկողին: Եզրակացությունը յոթ աշխատանքային օրվա ընթացքում տեղադրվում է լիազոր մարմնի պաշտոնական կայքում:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ
ՂԵԿԱՎԱՐ-ՆԱԽԱՐԱՐ

Դ. ՀԱՐՈՒԹՅՈՒՆՅԱՆ